

# Sakspapir

Sakshandsamar	Arkiv	ArkivsakID
Sveinung Toft	FA-M10	21/100

Saknr	Utval	Type	Dato
017/2021	Formannskapet	PS	04.02.2021

## Prosjekt knytt til drikkevatt i Masfjorden kommune 2021 - 2022

### Vedlegg:

Journalposttittel	Dato
Vassleidning kart Hosteland	31.01.2021
Søknad om tilkopling til kommunalt vatn - gnr 14 bnr 22 m.fl.	31.01.2021
Kart kvamme - vassleidningsprosjekt	31.01.2021
Oversikt over interessentar - framlegging av kommunalt vatn Rambjørsvika	31.01.2021
Leidning Rambjørsvika	31.01.2021

### Rådmannen sitt framlegg til vedtak:

#### Masfjorden kommune prioriterer følgjande prosjekt i 2021:

1. Ny trykkaukestasjon ved Legdavic
2. Trykkaukestasjon til planlagt bustadfelt på Varleitet.
3. Vassleidning frå område Fensfjordbygg til bustader i Yndesdalsvegen 22, 26 m.fl. må utgreiast meir før ein kan ta endeleg avgjerd om kommunal deltaking. Rådmannen får fullmakt til å forhandle med dei aktuelle abonnentane om fordeling av kostnader, og leggja fram avtale til politisk handsaming.

Oppstart av ny hovudplan for drikkevatt vert lagt fram som eiga sak hausten 2021. Prosjekt 4 og 5 nemnt nedunder vert å drøfta nærmare i samband med dette planarbeidet.

### Saksopplysningar:

#### Bakgrunn og fakta:

I budsjettsak 082/2020 vedteke i kommunestyret den 30.11.2020 ligg det inne årlege investeringar til drikkevatt på krone 600.000 i økonomiplanperioden 2021 – 2024.

Administrasjonen vil nedunder peike på fleire aktuelle prosjekt innanfor drikkevassområdet som det

er viktig å få drøfta og vedteke politisk.

1. **Ny trykkaukestasjon i Legdavika** er eit viktig prosjekt. Deler av denne sentrale trykkaukestasjonen er frå 80-talet, og administrasjonen ser at behovet for fornying av dette anlegget som svært stort. Anlegget her pumpar vatn opp i høgdebassenget på Hosteland, og sviktar anlegget her vil det vera kritisk for hovudvassforsyninga både til Hosteland og vidare til Hovden-bassenget i Gulen kommune, samt forsyninga som går over fjorden til abonnentane på Masfjordnes/ Sandnes. Noverande anlegg er vanskeleg å drifta med aggregat om det vert straumstans, og slitasje over tid har gjort det svært påkravd med nytt anlegg. Ny trykkaukestasjon i Legdavika vil kome på cirka krone 800.000,-.
2. I samband med drøftingar knytt til utbygging av **Varleitet på Kvamme** har administrasjonen kome til at det vil vera behov for ein mindre trykkaukestasjon for å sikre jamt trykk til bustadane som skal koma. Dette er ein mindre pumpestasjon og kostnaden vert stipulert til rundt krone 300.000,-. Deler av dette arbeidet kan kanskje gjerast i 2022, det får ein vite meir om når framdriftsplanen til utbyggjar/ entreprenør er klar. For å vera på den sikre sida rår ein til at det vert avsett midlar i 2021 til dette prosjektet, som vil gje nye innbyggjarar til kommunen. Det vert vist til eiga sak om utbyggingsavtale Varleitet, der denne utbygginga er skildra nærmare.
3. Det ligg føre **søknad frå Ivar Duesund** dagsett 17.12.2020 (sjå vedlegg) om tilknytning til kommunalt drikkevatn til 6 bustader/ eigdomar langs Yndesdalsvegen. I søknaden kjem det fram at ein eigedom har for lite drikkevatn og andre har drikkevatn av dårleg kvalitet, og at det difor hastar med å få gjort noko med vassforsyninga til dette området. Alternativet til kommunal vassforsyning er at dei må bore etter vatn sjølv. Nærmaste stad ein kan kople seg inn på offentleg vassnett er ved Fensfjordbygget, og får ein løyve av grunneigar til å kople seg på vassleidning ved Fensfjordbygget og til å gå over innmarka, vert grøfta ca 250 meter lang til den første eigdommen. Frå denne staden kan ein leggja opp til at naboskapet organiserer fellesgrøfter vidare. Stipulert grøftkostnad vert krone 500.000,- ( ved einingspris 2000 kr/grøftemeter). I tillegg må ein tinga, rør, kummer og røyrleggjararbeid, ein kostnad stipulert til rundt krone 100.000,-. Dette gjev ein total prosjektkostnad på kroner 600.000,-.
4. Det ligg føre brev (sjå vedlegg) frå fleire personar i **Rambjørsvika** som har skrive under på at dei ønskjer tilknytning til offentleg drikkevatn til sine hytter og bustader. Det vert lagt ved kart som både viser det aktuelle området og kor ein sjøleidning på om lag 1,3 km eventuelt kan leggjast for å forsyne området. Dei aktuelle eigedomane ligg på begge sider av Rambjørsvika. Etter administrasjonen si vurdering vil kostnaden med ny sjøleidning kunna stipulerast til rundt 2,5 millionar. I tillegg vil det koma kostnader med grøfter på land, slik at denne investeringa (stipulert) kan verta rundt 4 millionar.

5. Det er kome ønskje om at eigedomar på Kvamme kan få kommunalt drikkevatt fram til seg. Dette gjeld mellom anna 4 bebygde eigedomar og fire ubebygde tomter. Det vert vist til kart Kvamme, som viser at det må etablerast ei ny vassgrøft på ca 170 meter med tilhøyrande kummar til avstikk. Kostnad vert stipulert til rundt krone 400.000.

## **Vurdering**

Administrasjonen har vurdert kor behovet for investeringar er størst innanfor drikkevassområdet, og ønskjer å vera tydeleg på at ein meiner at ny trykkaukestasjon i Legdavika er det viktigaste å prioritere i 2021. Vidare meiner ein at det og er viktig å etablere god drikkevassforsyning fram til nye bustadfelt, jf. målsetting gjeve i kommuneplanen om å styrke folketalet, og at det difor er rett å prioritere ein mindre trykkaukestasjon ved Varleitet på Kvamme som nr 2.

Når det gjeld dei andre prosjekta 3, 4 og 5), meiner rådmannen at det er vanskeleg å finna budsjettmidlar til desse i 2021. Det største prosjektet knytt til Rambjørsvika viser at det etter kvart er vorte viktig å få på plass ein ny hovudplan for drikkevassforsyninga, der ein kan få drøfta dei store og langsiktige utfordringane knytt til drikkevassforsyninga grundig, både fagleg og i høve politiske prioriteringar. Av den grunn rår ein til at kommunestyret hausten 2021 får ei sak knytt til oppstart av ny hovudplan.

Dersom ein kan få til eit spleiselag med oppsitjarane på Hosteland kan ein likevel vurdere å opne for kommunal deltaking i 2021. Denne må då drøftast meir med oppsitjarane i området og andre før kommunen kan ta endeleg avgjerd. Ein rår til at det vert gjeve fullmakt til rådmannen å inngå drøftingar med eigarane av dei aktuelle eigedomane for å forsøke å få til eit spleiselag, som krev anleggsbidrag frå dei aktuelle i tillegg til sjølve tilknytingsavgifta på krone 19.400,- per abonnent. Inngått avtale med finansieringsplan m.v. må godkjennast politisk før prosjektet kan starta opp.

## **Konklusjon**

Det vert vist til tilrådinga.

## **Formannskapet - 017/2021**

### **FS - behandling:**

Saka vart drøfta.

Framlegg til vedtak vart samrøystes vedteke.

### **FS - vedtak:**

**Masfjorden kommune prioriterer følgjande prosjekt i 2021:**

1. Ny trykkaukestasjon ved Legdavik
2. Trykkaukestasjon til planlagt bustadfelt på Varleitet.
3. Vassleidning frå område Fensfjordbygg til bustader i Yndesdalsvegen 22, 26 m.fl. må

utgreiast meir før ein kan ta endeleg avgjerd om kommunal deltaking. Rådmannen får fullmakt til å forhandle med dei aktuelle abonnentane om fordeling av kostnader, og leggja fram avtale til politisk handsaming.

Oppstart av ny hovudplan for drikkevattn vert lagt fram som eiga sak hausten 2021. Prosjekt 4 og 5 nemnt nedunder vert å drøfta nærmare i samband med dette planarbeidet.